

全唐文

欽定全唐文卷七百三十四目錄

一 沈亞之一

柘枝舞賦 有序

古山水障賦


夢遊仙賦 有序

京兆府試進士策問

第二問

第三問

對省試策第一道



第二道

第三道

對賢良方正直言極諫策

對賢良方正直言極諫策

上冢官書

上李諫議書

與孺賢上人書

與薛浙東書

上壽州李大夫書

欽定全唐文卷七百三十四

沈亞之一

亞之字下賢吳興人元和十年進士歷殿中丞御史內供奉大和初爲德州行營使判官謫南康尉終郢州掾

柘枝舞賦

有序

往者某值宴於鄭衛之侯坐與客序樂作堂下行舞男女紛雜交貫率以百品而觀者蓋豐然旣罷昇鼓堂上絃吹大奏命爲柘枝舞則皆排目矢座客曰今有有土之樂舞堂上者惟胡部與焉而柘枝益肆於態誠足以賦其容也

因顧余序之以洗客念賦曰

昔神祖之克戎賓雜舞以混會拓枝信其多妍兮命佳人
以繼態撼隆冠之繁珂兮披文纓於大帶跪閃舉以揮猶
兮拖旋襟之檐曳驚遊思於情杳兮注橫波於穠睇顧巧
度之無窮兮將多變而若雲揚厲唱於鼉鼓兮儷蘭露之
芳津汨旁俯以裊影兮蕩風蕖於橫茵愕兮若驚弛兮若
懶歛然連姤翔然嫋婉振修袞以拋拂兮韜纖肱以綵綰
差重錦之華衣俟終歌而薄袒旣而抑倚昂拚蹈節振臂
驅捷蹠以促碎盡戎儀於弱媚見孫律於武姓入西河之

劍氣曲響未適邊風襲吹聞代馬之清嘶發言禽於詠類
客曰若此之狀也以鄭衛而前陳吾固知其將墜

古山水障賦

挹清臣之嘉思兮信竦予以峭孤迴補籍之暇筆兮賦他
山於遺圖擲琨瑤於訥口兮若含采以咀蘭惟古工之包
化兮啟羣峯於無間勢蹙巘以特起互騰排而上干翠參
差以玉立俱竦竦以攢攢於是瀕以長瀾森以怪木瑟汨
慄颺淒煩蕩燠浸平潦於楚澤冶妖韶於陽谷低霾橫暝
兮陳半腹夢雨神雲兮澹而不歸怨捨惹乎巖曲縹蘚青

離兮事幽澀細澗縣流兮洄噴噎山之人兮夕忘寐而坐
忘興帷紺枝兮帶黃葛暖草被崖兮垂綠髮翔鸞翔翠相
追征兮振錦舒繡錯以明兮啼羈酸雌裂皆吻兮風號穴
怒寥而清兮山中之木何彫榮兮

夢遊仙賦

有序

余昔夜夢寓遊一方樂態甚適覺而作賦題之夢遊仙其
辭曰

杳漠漠兮昇絕垠雲轡九天兮越崇門星赭曉以澹白瀾
咽潏於錦礫不樗笑而織娥喜闍導余而就將止襲烈蕙

之芳風送麗音於遼耳目恣邁而多適吾超超其樂此銀
墉兮桂箱差瑤踏兮上玉堂卷紅幕兮發繡戶中有人兮
結清處語媽延兮情綽捨命余廕於蘭之厦迴穠顏以一
顧嚮嬌眸而融冶煙津兮玉盤火桂兮炮鸞鼎娥司味和
苦酸羸吹旣調戛湘絃合吾飲食兮樂吾後園乃稱詩曰
白日低兮春塘滿紅華芬兮草芽短菱結帶兮荇含絲設
遨遊兮遵佳期又詩曰穠光醉兮昏縣縣焉與久兮樂萬
年春畱連兮其未央吐芳意於荃言忽發寤以無覩魂迷
念兮情牽旣諒人生之皆夢孰云夕非而晝是馳詠想之

悠悠兮軸吾情於萬里

京兆府試進士策問

問昔者秦襄公舉秦鄙之人逐犬戎於西河之外因其險而塞焉後代無敢逾始秦方列爲小國而東有諸侯窺地之兵西有強戎不忘之怨未聞當時秦嘗籍卒於外而屈於敵也此一侯者之志尚爾況臣天下之大哉今西邊制戎起隴黃花輔兩關自黃花拒塞倚漢中南逾山縣阻極巴蜀自開紫隴西北會彈箏杠于河塹于朔方夾河而東倚豐而魚有天障居其西以控戎者凡七師邈迤數千里

之間壁衝扼要之戎百有餘城若此足以流威而謹塞乎
且戎之力不能加古昔之患而邊防與地之兵方秦之多
倍百矣猶以不足於用卽東取卒於淮南吳越東南取長
沙至於衡山臨江更歲以易卒彼其土之人逾寒不續而
投之積冰之地役其所不習用其所不能非獨饋輓之不
勝於費也及聞墮指裂膚之事父母妻子聚而興哀今欲
疏罷徵之請則邊臣有失助之告如存乎舊規則贅疣而
無用得失之端幸稱其當

第二問

問時皆曰縣令之官爲能以化親於人矣訊其變化寵最之法曰歲益氓幾室賦隨而息之是令之誨人曰勞氓其來我者遂其所而保之吾能使吏不侵決不渝一歲曰僑人籍而不賦再歲曰僑人賦而不役誠著而不衰四鄰之人逋而來者屬袖於道歲告籍於其郡達於連帥卽遷之逋人之邑亦且虛籍以自蔽累賦於所存四鄰之邑更教誨以召之賦累而不能反者更往而逋之四土之人環遊不絕輕去其鄉間猶脫垢耳雖恩書亟降爲之濯煦然猶虛籍爲祖日增而不止豈褒尤寵最之謬哉不然其咎安

在眾君子皆含智負能惟其不恡嘉謀竚聞通理

第三問

問夫才之居人也自中正降短長之不相侔甚矣今士非列於朝請者必仰於吏部故歲調試千餘人卽假疑於事使對書決之亦有冒買其書者莫有所禁其取捨之程考於字句耳夫櫨薨輓輻之具也細不掩短狹不模撓隨用有輳於今士一規而選授於殊執豈果盡其性哉欲去書判之選則有司者無以爲准約未知何以而得其中也惟陳必中之言以程斟酌之度

對省試策第一道

問教化賞罰以之大端固並行而不相悖在交修而底于道漢文以恭默致理式合古風鄭產以刑鼎興譏是稱叔代昭然薄厚豈俟敷陳然則馭時自有宜急禮云不從其所行斯不亦教化之功乎又云使人有所愧恥斯不亦賞罰之羞乎若曰澄其源而清其流端其本而正其末陶然而臻福壽薰然而化暴戾體則盛矣如寬舒何是黜幽陟明爲瞰察也其或舉一善而眾皆勸懲一惡而眾皆懼進猶加膝辱過撻市效則有矣如削刻何是道德齊禮爲虛

說也今聖上思理股肱宣力有司登選茂異同觀材器酌
時而行必有所先原始要終行能精辨幸陳其要無或蔓
詞

對賞罰所以禁弊也不可使其弊也夫太寬則上逸而下
偷太急則上勞而下怨下偷則怠慢生下怨則暴亂作故
殷周之王因其弊而更張之因人利而改作之是以不相
襲制而秦驕霸嗜利吞天下以入咸陽鞭百國之貨以富
宮室當是時秦法行乎四海天下之人側足而立漢興悉
蕩其煩苛與天下更始樹可守之法使賞必能刑必罪至

於文帝漢天下已四十年矣文帝躬節儉務簡易因其時而若子產者當微諸侯爭霸禮讓流喪盜賊羣起鑄鼎著刑以救時耳今可法之理於近莫如太宗龍興革亂隋之殘政修法度立中庸圖堯舜爲鏡於前用以爲明白之理使房杜爲之相以輔不及當時之風一化天下流乎開元井閭之人反樸若先古然夫旣理之代理之在中而已矣猛則救以仁寬則輔以毅孔子亦曰從容中道聖人也亞之雖不肖然讀其書見三代之作如此秦漢亦如此太宗中庸之理又如此且貞觀之來非遠而鄉中之老往往猶

有咏其事者伏惟明徵之可從容言於上前

第二道

問文武之道布在方策博通具舉惟君子能之是知超乘
穿札非謂武也搜章摘句非謂文也苟不通乎源流而徒
習乎藝事工則工矣是謂末節者終軍班超奮于文儒有
請纓投筆忘壯圖急病何代無之乃有淮右小醜久稽
天憲聖上復燾之念極綏懷之仁網開三面武引七德
而鼠盜蜂結超超未賓忠臣義士有以憤激今明詔旣下
王師鼓行視彼兇殘坐見殲蕩誠泰山洪河壓卵注瑩不